

Luzcai: Aeu Dijyuz Guh Giuz Gaq Diuz Loh Doengzsim Minzcuz Doxgiet

Gaenh geij bi daeuj, Luzcai Yen aeu couqmaenh gij eiqsik Cunghvaz Minzcuz ranz vunz ndeu guh diuz sienqmeh, cizgiz damqra diuz loh moq “dijyuz + doxdax” “dijyuz + vwnzva” “dijyuz + gyauyuz” daengj, aeu dijyuz guh giuz, coicaenh gak minzcuz samgyau, vih couqmaenh gij eiqsik Cunghvaz Minzcuz ranz vunz ndeu daezhawj diuz loh saedhengz.

Doenggvaq guh hozdung doxdax lai cungj lai yiengh, saedyienh gak dieg lai lienzoengh, coicaenh gak minzcuz sam gyau. Ciepbanh gaiq daih’it daengx guk hagseng(bouxcoz) yindungvei (nyingznaq hanghmoeg), 2023 heux Gvangjsih goengloh danci seiqqyiaiq liebbyaij doxdax (duenh Luzcai) daengj gozci ndaw guk dijyuz doxdax, gwnz ciengz doxdax yienh’ok gij yienghsiengq cingsaenz gak minzcuz doxgiet doxhwnj, haenqrengz

baenaj. Lienzdaemh damqra aeu “mbanj BA” guh caidij, guh dijyuz hozdung lajmbanj lanziuz doxdax, caemhcaiq yungh aen vunqsik “hamj mbanj gapdoh, lai minzcuz doxgyaux bienbaiz”, lumjbaenz Swbaiz Cin “Gun Cuengh Myauz lenzdui”、Cunghdu Cin “doh Cuengh Gun ranz vunz ndeu” daengj, hawj gak cuz duiyenz youq ndaw doxdax gyalai cingzgamj, lai doxrox.

Aeu cieng, sam nyied sam, aen yangh ndeu aen ciet ndeu daengj guh seizgei, roengzrengz guh ndei gij hozdung doxdax miz minzcuz daegsaek “angj minzcuz dijyuz”. Lienzdaemh sam bi youq mwh sam nyied sam guh aen ciet angq feihyiz minzcuz dijyuz, baijok feihyiz dijyuz hanghmoeg ciengj bauqva, foux lungzfiengz daengj. Youq gwnz gaihmsiz doxdax daihgingz anbaiz

“langhbaij minzcuz vwnzva”, lumjbaenz biujyienj foux faexsoux Boux-cuengh, foux gyongnamhhenj Yauz-cuz, caijdinvenz Myauzcuz daengj, caemhcaiq laeb giz dieg langhbaij gaicawx gij gwn ndei feihyiz, doxgaiq fwnzguh, saedyienh “ciengz doxdax ndeu, lai yiengh daejniemh”. Youq segih, lajmbanj hwnqguh minzcuz conzdung dijyuz vwnzva cangzlangz, guh minzcuz dijyuz vwnzva cihsiz lwnhgangj, daezswng ginzcong nyinhdoengz caeuq roxyinh minzcuz conzdung dijyuz vwnzva miznaj.

Dawz bouxcoz nyezrauh dijyuz gyauyuz dangguh “gunghcwnz laeb giek” minzcuz doxgiet, doenggvaq dijyuz gyauyuz yungzhab beizyangj “bouxsiycej minzcuz doxgiet”. Youq cunghyoz siujyoz hailaeb dangz minzcuz conzdung dijyuz, dazyinx caeuq gujli gak cuz hagseng cizgiz

camgya gij conzdungj dijyuz hozdung hingzsik lai cungj lai yiengh, sengdoengh hozboz, ndangcangq doxhwnj, lumjnaeuz foux haizgieg, caij maxfaex, dwkdom, fouxsaes daengj, daezsang gij cunghab suciz gak cuz hagseng, coicaenh hagseng cienzmienh hwnghat caeuq ndangcangq majhung. Guh hong genj cwkbwh dijyuz vunzcaiz, aeu gyonjcomz daengz lajmbanj senjbaz daengj fuengsik ciuseng genj caiz, vih 2026 nienz Gvangjsih Daihcibroek Gaiq Yindungvei dwk roengz gij giekdaej vunzcaiz ndei. Cizgiz genj baij yindungyenz camgya dijyuz doxdax gaep swcigih, gaep guekgya, 2024 nienz youq Gvangjsih bouxcoz nyezrauh denzging, nyingznaq, yaengxnaek, cunghangh daengj hanghmoeg doxdax ndaej ciengjbaiz 34 gaiq. (Veiz Cinhyen/韦珍艳)

Nanzningz: Langhbaij Gepgoemjyaenq Ginhsiz Bwzcauz

6 nyied 18 hauh, “Yenz Vei fungvaz — aen langhbaij gepgoemjyaenq ginhsiz gij ndaejgeiq Cunghvaz Minzcuz ranz vunz ndeu ndaw ringaek Bwzcauz” youq Nanzningz Suhvayen guh. Aen langhbaij youz Nanzningz Minzcunghvej, Nanzningz Vwnzlenz, Gvangjsih Suhfaz Hezvei, Gvangjsih Ginhsiz Yenzgiuvei daengj danhvei lienzhab guh. Mbat langhbaij neix gunh baij ok 70 lai gienh gepgoemjyaenq ginhsiz dijbauj, laebdaeb langhbaij daengz 7 nyied daej, bouxyawj ndaej doenggvaq gepgoemjyaenq ginhsiz rox gij lizcwnz Cunghvaz Minzcuz cauxbaenz hwnghat hungloet de, gamjsouh gij vwnzva neihanz laegna ringaek Bwzcauz, gamjsouh gij yinxdaez Cunghvaz vwnzva. (Cangh Sinhyiz/张新怡 Vangz Saili/黄赛利)



▲ Bouxyawj nyinhcaen yawj gepgoemjyaenq.

Cangh Sinhyiz ingi

Yinhcwnz: Cunghyihyoz Fuzvu Soengq Daengz Bakdou

6 nyied 20 hauh, Swcigih Cunghyihyoz Gvanlijigiz cujiz conhyah bae daengz Yinhcwnz Yen son lwnh Cunghyihyoz cihsiz, doenggvaq yawj bingh mbouj aeu ngaenz, son yw bingh daengj fuzvu hozdung, lai hawj ginzcong yungh Cunghyihyoz bae baeuj ndangcangq. (Fanz Saugvanh/樊绍光)



▲ Canghyw bang ginzcong soeng ndokndang.



▲ Minzgingj caeuq gyoengz siujhagseng doxcam doxhoiz gimqdoeg cihsiz.

Fuzsuih: Guh Senhconz Gimqdoeg Cawjdaez Hozdung

6 nyied 20 hauh, yaek daengz daih 38 aen ngoenz gimqdoeg gozci, Fuzsuih youq Sam Nyied Sam Fapceih Gvangjancz Gimqdoeg Cawjdaezyenz guh senhconz gimqdoeg cawjdaez hozdung. Hozdung doenggvaq laeb daiz cam gimqdoeg faplwd, fat senhconz soujcwz, minzgingj gangjgej daengj hingzsik, son ginzcong baenzlawz fuengzdoeg, gimqdoeg.

(Luz Vwnzfeih/卢文斐)